

Dr. Cesar Perez, Psiquiatra di MFAA:

Si uso di marihuana ta sigui asina den futuro Aruba no ta bay tin profesionalnan

ORANJESTAD (AAN) – Dr. Cesar Perez, Psiquiatra di FMAA, a expresa den conferencia di prensa, cu si den nos isla tin hopi hoben menor di 21 aña, cu ta usando marihuana sea di manera cronico of no, tur cos tin su riesgo.

Pa Aruba e riesgo aki ta cu den futuro, si e situacion ta sigui asina no lo bay tin mas profesional pasobra e muchanan aki no por concentra na scol, no por siña bon, no ta bay scol, tin problema di comportacion, y lo no por studia mes na

Universidad, pasobra su puntonan no ta bay bon. Aunke e no ta papiando di un cien porciento, si e ta referi na un porcentahe hopi importante. Esaki ta un preocupacion grandi cu nos tur mester tin riba e problema aki.

“Den mi pensamiento, na mi opinion, nos tin cu haci bastante esfuerzo riba prevencion di adiccion. Mi ta kere cu e mayor parti di e recursonan pa traha riba e tema aki mester wordo uza den prevencion. Esaki ta un resultado cu nos ta

bay haci aki un diez aña pa contraresta loke realmente ta pasando akinan, cu uso di marihuana” dr. Perez a subraya.

Adiccion ta un problema cu ta afecta henter un familia. Ora cu un mucha ta uza marihuana na scol, di biaha ta trece problema den cas, su mayornan y e funcionamiento di cas ta bira un problema real. “Hopi mucha no ta conciente ainda di e peligrosidad cu marihuana tin pa nan”, e psiquiatra a subraya.

El a acentua cu hopi hende

ta kere cu marihuana no ta un problema, pero e ta un problema! Legalizacion di marihuana ta algo cu mester wak ki beneficio tin y ki daño tin tambe. Mester tin un ekilibrio riba esaki, y wak si ta algo di berdad necesario y importante, of ta mas importante pa nos bringa awor cu e situacion cu ta pasando na Aruba.

“Tur cos tin su momento den bida, y ami ta sinti cu awor ta hopi mas importante pa nos bringa contra e situacion real cu ta pasando, y no pensa riba

legalizacion di un droga cu na final ta causando hopi daño na personanan cu ta usando, mas tanto e muchanan jong”, docter Perez a subraya.

El a remarca cu ora un mucha ta uza marihuana e ta pasa den un proceso di degeneracion, y un hoben di 15-16 aña cu ta use na un forma cronico, ta sinti sintomanan di hende grandi caba, y esaki ta un realidad. Y esaki ta nifica cu su capacidad intelectual y cognitive ta hopi disminui caba.